

12 OCT 1999

BN - Perlis

RAKYAT PERLIS DIUNDANG JAYAKAN SAMBUTAN SUKU ABAD BN

KANGAR, 12 Okt (Bernama) -- Rakyat Perlis akan berpeluang meraikan ulang tahun suku abad penubuhan Barisan Nasional (BN) yang akan disambut secara besar-besaran di Stadium Utama di sini pada 24 Okt ini.

Menteri Besar Datuk Seri Shahidan Kassim berkata, BN akan menyumbang sebanyak 30 ekor lembu yang akan disembelih sempena sambutan itu yang diadakan serentak dengan hari keluarga BN negeri.

"Setiap kawasan dewan undangan negeri akan dibekalkan dua ekor lembu .. mereka boleh masak di situ dan makan beramai-ramai," katanya kepada pemberita di sini hari ini.

Bagi memeriahkan majlis itu, beliau berkata, persembahan hiburan akan berlangsung selama dua jam mulai pukul 5 petang dan akan bersambung selama satu jam lagi pada sebelah malam mulai pukul 10 malam.

Selain itu, cabutan bertuah yang menawarkan hadiah istimewa serta pertunjukan bunga api akan turut diadakan.

Sebelum persembahan hiburan itu bersambung, lebih 30,000 anggota parti komponen BN dan keluarga mereka akan mendengar amanat Perdana Menteri Datuk Seri Dr Mahathir Mohamad yang akan disiarkan secara langsung sempena sambutan ulang tahun BN peringkat nasional.

Sementara itu, sebanyak 3,000 pelajar pusat pengajian tinggi di Perlis diundang menghadiri majlis gerak bakti yang akan berlangsung di Kompleks Warisan di sini pada Khamis ini.

Majlis itu diadakan bagi menanamkan semangat patriotisme para pelajar terhadap negara serta pentingnya mengekalkan nikmat kemerdekaan.

-- BERNAMA

AD RI